

AWASI CUBAAN RENGGANGKAN MEDIA DAN KERAJAAN — PM

KUALA LUMPUR 19 Sept. — Perdana Menteri malam ini mengingatkan media massa supaya mengawasi tindak-tanduk pihak-pihak tertentu yang sedang cuba merosakkan kerjasama erat yang wujud antara kerajaan dengan media massa.

Datuk Sri Dr. Mahathir berkata, pihak-pihak tersebut sedang cuba melemahkan hubungan rapat itu. Beliau meminta media massa supaya lebih berhati-hati.

Berucap di majlis Penyampaian Hadiah Kewartawanan Malaysia di sini malam ini, Perdana Menteri menegaskan, kerjasama yang rapat antara media massa dengan kerajaan tidak bermakna media massa tidak boleh menegur kerajaan.

"Kerajaan sebenarnya menggalakkan kritikan-kritikan dan ini kerap dibuat seperti yang dapat kita baca dalam akhbar-akhbar dan penerbitan lain," katanya.

Bagaimanapun, kata Perdana Menteri, kritikan-kritikan yang dibuat biarlah

yang berasas, membina, jujur dan dengan niat baik untuk meningkatkan lagi persefahaman dan perpaduan.

Perdana Menteri berkata lagi, pihak media tidak harus bersikap konfrontasi untuk membuktikan kredibilitinya dan hubungan yang rapat dan mesra dengan kerajaan tidak semestinya akan menghi-langkan kredibiliti itu.

Kerjasama positif

"Seperti mana kita sedia maklum, kefahaman yang wujud di antara kerajaan dengan media massa di negara kita ini merupakan satu kerjasama positif yang telah memberi manfaat kepada pembangunan dan kemajuan negara kita," kata beliau.

Perdana Menteri berkata, media massa mestilah bersama-sama bertindak ke arah mewujudkan sebuah masyarakat yang lebih sejahtera dan untuk mencapai hasrat

tersebut adalah sangat penting bagi media massa menentukan agar laporan-laporannya tidak mendatangkan kesan negatif.

Menurut Perdana Menteri, jika persefahaman dan perpaduan tergugat, ketenteraman dan keselamatan negara juga akan terancam.

"Mengawal dan memulihkan keadaan memerlukan banyak masa dan tenaga selain daripada kesulitan-kesulitan yang timbul," ujarnya.

Dalam menggariskan peranan media massa, Datuk Sri Dr. Mahathir menarik perhatian terhadap peranan berat yang harus dipikul dan dilaksanakan dengan penuh berkesan bagi memelihara ketenteraman dan keharmonian di negara ini.

Dalam ucapannya itu Perdana Menteri menyatakan penghargaan kerajaan kepada pihak media massa yang telah banyak memberi sumbangan ke arah usaha-usaha membawa kesejahteraan kepada negara dan rakyat.

"Walaupun terdapat sebilangan kecil di kalangan media massa yang mempunyai sikap yang berlainan, tetapi pada keseluruhannya media massa di negara ini telah membuktikan keikhlasan dan kewibawaan dalam melaksanakan tanggungjawabnya," ujar beliau.